

Oqaasiliortut tallimangornermi maajip ulluisa 18-ianni
2001, nal. 13.00 ataatsimiinnerannit imaqarniliaq

Peqataasut: Carl Chr. Olsen, Alibak Steenholdt, Sofia Geisler, Kelly Berthelsen, allatsigalugu Kristine Olsvig. Nuka Møller angalanini peqqutigalugu peqataangilaq.

Oqaluuserisat:


1. Oqaluuserisassanut qulequttanik akuersineq.
2. Marsip ulluisa 20-anni ataatsimiinnermit imaqarniliamut akuersineq.
3. Taaguut *qulliarneq* pillugu Otto Steenholdtip saaffiginnissutaa.
4. Taaguutit: *atortorissaautilerisoq* aamma *namminersortunngorsaaneq* pillugit Sofia Geislerip eqqartugassatut saqqummiussai.
5. Taaguut *Qerinnarpoq*.
6. Oqaatsit ataasiakkaat.
7. Nunat Avannaamioqatigiit oqaatsit pillugit ataatsimeersuarnissaat, aggustip naalernerani Sverigemi pisussaq.
8. Oqariartaaseq *Sallunaveeqqut* pillugu Alibak Steenholdtip eqqartugassatut saqqummiussaa.
9. Taasariaqartut allat.

- 1 pillugu -

Taaguut *Sallunaveeqqut* pillugu AS-ip saqqummiussaa oqaluuserisassanut ilanngunneqareermat, oqaluuserisassat akuerineqarput.

- 2 pillugu -

Imaqarniliaq akuerineqarpoq.



- 3 pillugu -


CCO.: Siornatigut *qulliarneq* pillugu Sisimiut Tusaataata saaffiginninnera tunngavigalugu Oqaasiliortunit sammineqarnerani oqaatigineqarpoq **mund og klovsyge** kalaallisut **qulliarneq**-mik taaguuteqartoq. CCO-ip Robert Petersenillu taamatut eqqaamaniarpaat. Kisianni aalajangiinerup pappiaranngorlugu takussutissartaa toqqortani nassaarineqanngilaq taamattumillu maannamut allaganngorlugu uppernarsaatissartaqanngikkallarpoq.

AS.: Mund og klovsyge ordbogit najoqqutaralugit ima nutserneqarsimavoq: "**nersussuit nappaataasa ilaat tunillaattartoq**". AS-ip eqqaamanngilaa taanna Oqaasiliortuni eqqartorneqarsimanersoq. Aamma taamani oqaatsimut *qulliarneq*-mut suna tunngavigalugu taamak taaguuserneqarsimanersoq nalunarmat, isumaqarpoq takussutissarsioqqaartariaqartoq aalajangiisimanerup uppernarsaatigisinnaasaanik ujaaseqqaarnikkut.

SG.: Sisimiut Tusaataaniit Hans Larsenip saaffiginnissimanagera tunngavigalugu, imaassinnaavoq allakkatigut Oqaasiliortuniit aalajangiineq pillugu akissuteqarfigineqarsimasoq.

Oqaatsip nagguigaa: *qulleq*, qallunaatut: *tåre*. Uumasut napparsimanermikkut qulliliorlutillu nuakoortarput. Ukiorpasuarini inuit sungiusimallugu *qulliarneq* taaguutitut atugaraat.

CCO.: Siunnersuuteqarpoq Otto Steenholdt allakkatigut akineqassasoq nalunaarfigalugu eqqaamasat tunngavigalugit oqaaseq *qulliarneq* 1980-ikkut ingerlaneranni Oqaasiliortunit sammineqarsimasoq, taamaakkaluartorli allakkatigut takussutissartaa ujartariaqartoq. Ilanngullugu nalunaarfigineqassaaq sammineqarsimaneranut takussutissartaa



uppernarsiniarlugu misissuisoqassasoq, nassaarineqarpallu kingusinnerusukkut erseqqinnerusumik nalunaarfigineqassasoq.

Siunnersuut peqataasunit tamanit akuersaarneqarpoq.

- 4 pillugu -

SG.: Taaguut *atortorissaarutilerisoq* pillugu misissueqqaarniarami eqqartornissaa kinguartikkallarusuppaa, ilimanarmat taaguut KNR-imi sulisut namminneerlutik pilersissimagaat.


KB.: Nipilerisoq/assiliisorlu ataatsimoortillugit *atortorissaarutilerisoq* taaguutigisimassavaat.

AS.: Atortorissaarut sunaluunniit nalinginnaasumik teknikkimut tunngavoq. Taaguutip *atortorissaarutilerisoq*-p immini nassuiangilaa atortorissaarut suna pineqarnerisoq.

CCO.: Atortorissaarutit assigiinngitsorpassuummata *atortorissaarutilerisoq* erseqqissaataangilaq. Eqqoriarneqarsinnaavoq kisianni nassuitsuunngilaq. Apeqqutaavoq *teknikki* taaguutitut akueralugu tiguinnarneqarsinnaanginnerisoq. Nassuilluinnartumilli kalaallisut taaguuserneqarsinnaappat ajorinngilaa.

Oqaasiliortut isumaqatigiipput SG-ip taaguutip pilersimanera paasiniaqqaassagaa, kingusinnerusukkullu eqqartorneqaaqqinnissaanut Oqaasiliortunit isumaliutersuutigineqassasoq.

SG.: Oqaaseq *namminersortunngorsaaneq* naatsumik ima erseqqissarneqarsinnaavoq: "namminersortutut ingerlanneqarlernissaa



siunertaasoq, piginneqataassutsillu tuniniarneqassasut, pisortat akuutikkunnaarlugit." Erseqqissaat taanna najoqqutaralugu SG-ip siunnersuutigaa *namminersortunngorsaaneq* atorunnaarlugu **piginneqataassutsinik tuniniaaneq**-mik taaguuserneqassasoq. Imaluunniit erseqqissarneqassasoq oqaatsip "*namminersortunngorsaaneq*"-rup piffisaq aallajangersimasumik killilikkagaq taamaallaat attuuffigisinnaagaa.

CCO.: 1970-ikkut ingerlaneranni namminersortunngorsaaneq pilermat oqaaseq, qallunaatut: *hjemmestyre* nutserneqanngilaq. Nutsernagu nassuiarnagulu pisoq taaguuserneqarsimavoq imatut: *namminersornerulerneq*.


Suliffik privatusoq tassaavoq ingerlataq sunaluunniit pisortanit naalagaaffimmilluunniit akuuffigineqanngitsoq. *Privatisering*, peqatigiilluni ilusilernerata aalajangigarinnngisaanik taaguusertariaqarpoq. *Selvejende*, kalaallisut tassaavoq: imminut pigisoq.

AS.: Assersuutigalugu piginneqataassutsit imaattut: "Aktionær, Grønlands Hjemmestyre"; Matumani qitiusumik ingerlatat illuartinniarneqarput, taamaattumik ilusissaa apeqqutaalluni uku arlaat: namminersortunngorsaaneq imaluunniit namminersortunngortitsineq aalajangiunneqarsinnaapput.

SG.: Siunnersuutigaa tulliani ataatsimiinnissamut Oqaasiliortut tamarmik oqariartaaseq isumaliutersuutigissagaat, aammalu ilanngullugu siunnersuutigaa, suliffeqarfiit arlaata pisortaa, assersuutigalugu Gerhard Petersen, qaaqqullugu imaluunniit allaffigalugu paasinaaffigineqassasoq, oqariaaseq *namminersortunngorsaaneq* qanoq paasisimaneraat nassuiaateqartinniarlugu.

Oqaasiliortut siunnersuummut akuersaarput.

- 5 pillugu -



CCO.: Issisiut 0 gradimiit miinusinngoraangami qerinnarsisarpoq. Kisianni miinusimiit kissatsikkiartortarnera taaguuteqartinneqanngilaq. Issisiut issinnerulersimagaangat KNR-imi sulisut 0 grad "qerinnarpoq"-mik taasarpaat.

AS.: *Qerinnarpoq* atorunnaartariaqarpoq, tassungalu taarsiullugu oqaatsit ukut atulerlutik: **issi, kiak 0 grad**-ilu. Taamaalilluni paatsuungatitsisarneq atukkunnaassaaq.

KB.: Qallunaatut oqaaseq *frysepunkt* 0 gradiuvoq.


CCO.: *Frysepunkt* "qerinnarpoq"-mik taaguuserlugu nutsinnarneqarsimagunarpoq. *Frysepunkti* allatigut atorfissaqartinneqassappat, soorlu ilinniutinut, oqaaseq **qerilersarfik** atorneqarsinnaavoq. Tamatuminnga Isak Johansen allakkatigut akineqassaaq, KNR-imilu sulisut nalunaarfigineqarlutik.

- 6 pillugu -

CCO.: *Ersarippoq - erseqqippoq*-llu pillugit Louis Olsen nassuiaateqarsimavoq. Ullutsinni tamarmik assigiimmik isumaqartillugit atugaapput. Taamaakkaluartoq oqalunnikkut **tusaasat erseqqittarput, isigisalli ersarissuusarlutik.**

KB.: Oqaatsit atorneri ullumikkut maluginiarneqartorujussuanngorput, allaat sumiorpaluutinik atuisut kukkunerarneragaallutik appiunneqartalerput. Taamaammat oqaatsinik atuineq mianersorfissarujussuanngorpoq.

CCO.: Oqaatsit kalaallit tamarmik atugaat sumiorpaluutinut atanngitsut (standardsprog-dialektneutral) oqaatsitsinnut katersuuffiupput. Allassimasutigut tamanut saqqummiussassat oqaatsit kalaallit tamarmik atugaat



sumiorpaluutinin atangitsut atorlugit saqqummiunneqartussaapput, oqalunnikkulli sumiorpaluutit killeqanngitsumik atorneqarsinnaapput.

- 7 pillugu -

CCO.: Nunat Avannaamioqatigiit oqaatsit pillugit ataatsimeersuarnissaannut Oqaasiliortut peqataanissaat sulissutigineqarpoq. Ajornanngilaq Dansk Sprognævni siulliullugu paasisassarsiorfiginissaa, kingornalu aggustip ulluisa 30-aniit septembarip ulluisa aappaat ilanngullugu Nunat Avannaamioqatigiit oqaatsit pillugit ataatsimeersuarnissaannut peqataallutik.


CCO.: Oqaasileriffiup naqitertitaa "Taaguusersuutit" aappasaanik naqiteqqinneqarpoq. Tuniniarneqarnissaa Oqaasileriffimmit isumagineqassaaq.

CCO.: Oqaasileriffiup nittartagassaa sapaatip akunnerani tullermi naammassineqassaaq. Taanna pillugu CCO-ip Per Langgårdillu Toornaq Consulting A/S-imi sulisoq Nukaaraq Eugenius ataatsimeeqatigissavaat.

- 8 pillugu -

AS.: Oqaaseq: *sallunaveeqqut* qallunaatumut nutserneqarnerani isumaqatigitillugu ilanngunneqarsimavoq qallunaatut oqaaseq *pant*. Taamaattumik tiguaanerup isumaa *sallunaveeqqut*-mut naapertuutinngilaq, taamaattumillu apeqquserneqartariaqarpoq inuit **gidsler**-it qanoq kalaallisut taaneqarsinnaanersut.

KB.: Inuk tiguaasoq piumasaqartilluni tiguakkani **sallunaveeqqutit** atortarpai, piumasaminik neriorsorneqareeraluarluni salloqittarneqassagaluaruni arlaatigut pilliuteqarfissatut inuit **sallunaveeqqutiginiarlugit**.



Oqaasileriffik Sprogsekretariatet

Oqaasiliortut isumaqatigiillutik oqaaseq *sallunaveeqqut* tulliani
ataatsimiinnissamut isumaliutersuutiginiarpaat.

Oqaasiliortuni ataatsimiinneq tulleggissaq tallimannngornermi juunip ulluisa
aallaqqaataanni, nal. 13.00.

Carl Chr. Olsen
Siulittaasoq

Kristine Olsvig
Allatsi

Oqaasileriffik – Sprogsekretariatet

Postboks 980, DK-3900 Nuuk, Kalaallit Nunaat, +299 327344, +299 327342 fax),
oqaasileriffik@greenet.gl